

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA

Broj: 02-02-7-831/17
Sarajevo, 21.9.2017. godine

Z A P I S N I K

**21. sjednice Doma naroda Parlamenta Federacije Bosne i Hercegovine,
održane 27. aprila, 1. juna, 6. jula i 21. septembra 2017. godine**

Sjednica je počela u 12:49 sati.

Sjednicom je predsjedavala Lidija Bradara, predsjedavajuća Doma naroda Parlamenta Federacije BiH.

Na početku sjednice, predsjedavajuća je pozdravila prisutne delegate, predsjednika Federacije, Marinka Čavaru, zamjenika predsjednika Vlade Federacije, Veska Drljaču, ministricu Zoru Dujmović te ministre, Josipa Martića, Aljošu Čamparu i Matu Jožića.

Izostanak sa sjednice opravdao je Slađan Ilić.

Na osnovu evidencije Stručne službe, predsjedavajuća je konstatirala da sjednici prisustvuje 47 delegata, što čini većinu pa Dom naroda može raditi i punovažno odlučivati.

Predsjedavajuća je obavijestila delegate da je Deklaracija o podršci zahtjevima Bosansko-podrinjskog kantona Goražde, za prolazak putne komunikacije koja će povezivati Sarajevo i Beograd kroz područje Bosansko-podrinjskog kantona Goražde, upućena Vladi Federacije na izjašnjenje i davanje mišljenja te da će se o tome raspravljati na narednoj sjednici.

Potom, predsjedavajuća je predložila delegatima Doma naroda da usvoje zapisnike sa 18., 19. i 20. sjednice Doma naroda.

Na osnovu rezultata glasanja, predsjedavajuća je konstatirala da je Dom naroda Parlamenta Federacije Bosne i Hercegovina, jednoglasno, sa 42 glasa za usvojio Zapisnik sa 18. sjednice Doma naroda Parlamenta Federacije Bosne i Hercegovine održane 9. februara i 2. marta 2017. godine.

Na osnovu rezultata glasanja, predsjedavajuća je konstatirala da je Dom naroda Parlamenta Federacije Bosne i Hercegovina, jednoglasno, sa 48 glasova

za usvojio Zapisnik sa 19. sjednice Doma naroda Parlamenta Federacije Bosne i Hercegovine održane 2. i 30. marta 2017. godine.

Na osnovu rezultata glasanja, predsjedavajuća je konstatovala da je Dom naroda Parlamenta Federacije Bosne i Hercegovina, jednoglasno, sa 40 glasova za usvojio Zapisnik sa 20. sjednice Doma naroda Parlamenta Federacije Bosne i Hercegovine održane 30. marta 2017. godine.

Predsjedavajuća je podsjetila delegate da, na osnovu člana 104. Poslovnika o radu Doma naroda, mogu postavljati delegatska pitanja i pokretati inicijative ili izraziti nezadovoljstvo dobijenim, odnosno nedobijenim odgovorima.

Delegatska pitanja i inicijative

Anes Osmanović je postavio tri delegatska pitanja i uputio dvije inicijative.

Prvo pitanje postavio je Federalnom ministarstvu prometa i komunikacija, a ono glasi: Koliko, pored naših operatera, postoji firmi u Federaciji BiH koje pružaju usluge korištenja interneta, kablovskih i drugih paketa TV programa? Drugo pitanje, također upućeno federalnom ministarstvu prometa i komunikacija, glasi: Da li postoji evidencija tačnog broja korisnika usluga pomenutih firmi koji nisu u sastavu naših operatera, a pružaju iste ili slične usluge, i da li je svaki kućni priključak legalno prikazan, oporezovan i evidentiran? Treće pitanje uputio je Federalnom ministarstvu zdravstva i Federalnom ministarstvu okoliša i turizma, a odnosi se na antene putem kojih se pružaju usluge korištenja interneta, kablovskih i tv operatera - da li su ispitane, atestirane, da li postoji neki pravilnik koji reguliše izbor antena, da li utiču na zdravlje, da li su ekološki prihvatljive i da li se o tome uopšte vodi računa?

Inicijative je uputio Vladi Federacije, Federalnom ministarstvu prometa i komunikacija i Federalnom ministarstvu okoliša i turizma. Prva inicijativa je za formiranje stručnog tima koji bi uredio ovu oblast, ispitao utjecaj tih emitera na okolinu i zdravlje i sve to predočio u formi zakona, kojim bi ova oblast bila tretirana, a druga, za najbrže moguće ispitivanje utjecaja antena, kablova i priključaka na okolinu i zdravlje ljudi.

Segmedina Srna Bajramović je postavila dva pitanja.

Prvo pitanje postavila je Vladi Federacije i Federalnom ministarstvu energije, rudarstva i industrije. Zanimalo je eventualno razmatranje povećanja cijena struje za domaćinstva za 20%, odnosno da li se istinski razmatra takav potez ili je riječ samo o medijskoj špekulaciji.

Drugim pitanjem je zatražila da joj se dostavi informacija o svim dodijeljenim grantovima pojedincima ili organizacijama, a kojima raspolažu predsjednik i potpredsjednici Federacije BiH, premijer Federacije i zamjenici premijera, te nosioci rukovodnih funkcija u oba doma Parlamenta Federacije BiH, sa jasno navedenom svrhom utroška sredstava sa stavke tekućih transfera u 2016. i 2017. godini, a koje su vršene bez javnog poziva.

Goran Akšamija je Vladi Federacije i Federalnom ministarstvu za pitanja boraca i invalida odbrambeno-oslobodilačkog rata uputio inicijativu za vraćanje u parlamentarnu proceduru Nacrta zakona o izmjenama i dopunama Zakona o posebnim pravima dobitnika ratnih priznanja i odlikovanja i članova njihovih porodica.

Mirvet Beganović uputio je jednu inicijativu i postavio jedno pitanje. Inicijativu je uputio Vladi Federacije da u što kraćem roku u parlamentarnu proceduru dostavi Zakon o konsolidaciji poljoprivrede.

Pitanje je postavio Vladi Federacije, premijeru Federacije, Federalnom ministarstvu poljoprivrede, vodoprivrede i šumarstva i Federalnom pravobranilaštvu koje se odnosi na imovinu Agrokomerca.

Zatražio je da se o istom očituje Federalno pravobranilaštvo, kao i da se izvrši nova revizija svih sudskih vještačenja koji su bili predmet prodaje objekata imovine Agrokomerca i da se utvrdi šteta koja je nanesena na bazi tih sudskih procjena kao i da se obeštete oni koji su na zakonit način došli do imovine ali im je nanesena šteta.

Aner Žuljević je zatražio da mu Vlada Federacije dostavi odluke donesene na 59. sjednici od 10. marta 2017. godine, a koje se odnose na davanje saglasnosti na zaključivanje ugovora o zalogu novčanih sredstava i potraživanje između Razvojne banke Federacije i Vlade Federacije u svrhu osiguranja izvršenja obaveza iz ugovora o kreditu od 13.2.2017. godine zaključenog između Razvojne banke i Autocesta Federacije u iznosu od 48 miliona KM, kao i ugovor o kreditu. Također, upitao je ko ima pravo ugraditi i koristiti rotaciona svjetla na službenim vozilima na svim nivoima u Federaciji, da li se o tome vodi službena evidencija te da li se poduzimaju određene inspeksijske aktivnosti u smislu otkrivanja očigledne zloupotrebe po tom pitanju i da li postoje određene kazne.

Jasenko Tufekčić Kolegiju Doma naroda uputio je dvije inicijative. Prva se odnosi na to da se uputu inicijativa Agenciji za državnu službu Federacije Bosne i Hercegovine za revizijom rješenja svih zaposlenih u službama Parlamenta Federacije BiH. Druga inicijativa se odnosi na to da se u razgovore o pitanja prostornog rješenja Parlamenta Federacije uključe i Gradsko vijeće Grada Sarajeva i gradonačelnik Sarajeva.

Refik Poparić pokrenuo je inicijativu za implementaciju člana 5. Zakona o osnivanju instituta za medicinsko vještačenje zdravstvenog stanja ("Službene novine Federacije BiH", broj 70/07).

Mladen Lonić je postavio pitanje Vladi Federacije u vezi početka gradnje brze ceste Bosanska Krupa-Bihać. Upitao je da li će biti vršena nova kategorizacija magistralnog puta M14 A Bosanska Krupa-Bosanski Petrovac.

Željko Mirković je zatražio da mu se dostavi izvještaj o utrošku sredstava po osnovu GSM licence iz 2015. i 2016. godine, kao i program utroška sredstava službe za unaprijeđenje cestovne infrastrukture u kantonima i općinama u cijeloj Federaciji BiH za 2016. godinu.

Slaviša Šućur pokrenuo je inicijativu za ukidanje odredbe u uredbi koja je uvela obavezu vlasnicima malih obrta da dnevno polažu pazar.

Nakon delegatskih pitanja, Dom naroda utvrdio je dnevni red.

Delegat Aner Žuljević zatražio je pojašnjenja od članova Kolegija u vezi uvrštavanja na dnevni red sjednice Dom naroda - a vezano za izjašnjavanje o inicijativama za određene materijala koje je ranije uputio a koji su razmatrani na sjednicama Predstavničkog doma - Prijedloga rezolucije o borcima, Nacrta zakona o volontiranju kao i amandmana na Ustav Federacije koji se odnose na određena krivična djela. Zamolio je Kolegij da se ovi materijali stave na dnevni red naredne sjednice.

Predsjedavajuća je obavijestila delegate da je Vlada Federacije dostavila Prijedlog zakona o penzijskom i invalidskom osiguranju sa prijedlogom da se razmatraju po hitnom postupku.

Prije izjašnjavanja delegata o ovom prijedlogu, Domu se obratio Vesko Drljača, federalni ministar rada i socijalne politike, kako bi obrazložio hitnost postupka.

Na osnovu rezultata glasanja, predsjedavajuća je konstatirala da je Dom naroda prihvatio prijedlog da se Prijedlog zakona o penzijskom i invalidskom osiguranju razmatra po hitnom postupku, jer su 33 delegata glasala za, tri delegata su bila uzdržana, a 14 delegata je bilo protiv.

Također, predsjedavajuća je obavijestila delegate da je Vlada Federacije dostavila Prijedlog zakona o izmjenama i dopunama Zakona o radu sa prijedlogom da se razmatraju po skraćenom postupku. Razloge za skraćeni postupak ponovo je obrazložio, Vesko Drljača.

Na osnovu rezultata glasanja, predsjedavajuća je konstatirala da je Dom naroda prihvatio prijedlog da se Prijedlog zakona o izmjenama i dopunama Zakona o radu razmatra po skraćenom postupku, jer je 37 delegata glasalo za, tri delegata su bila uzdržana, a 11 delegata je bilo protiv.

Predrag Kojović, delegat u Domu naroda, izjavio je da povlači Prijedlog zakona o izmjenama i dopunama Zakona o porezu na dobit.

Potom je predsjedavajuća izvjestila delegate da je Kolegij Doma naroda nakon konsultacija predložio da se Prijedlog zakona o izmjeni i dopuni Zakona o plaćama i naknadama u organima vlasti Federacije Bosne i Hercegovine kojeg su predložili Aner Žuljević, delegat u Domu naroda i Elvir Karajbić, poslanik u Predstavničkom domu Parlamenta Federacije BiH po hitnom postupku, skine s dnevnog reda, jer Prijedlog zakona još nije razmatran na sjednici Predstavničkog doma.

Na osnovu rezultata glasanja, predsjedavajuća je konstatirala da je Dom naroda prihvatio prijedlog da se Prijedlog zakona o izmjeni i dopuni Zakona o plaćama i naknadama u organima vlasti Federacije Bosne i Hercegovine, kojeg su predložili Aner Žuljević, delegat u Domu naroda i Elvir Karajbić, poslanik u Predstavničkom domu Parlamenta Federacije BiH po hitnom postupku, skine s dnevnog reda, jer je 39 delegata glasalo za, tri delegata su bila uzdržana, a dva protiv.

Predsjedavajuća je obavijestila delegate da Kolegij Doma naroda predlaže da se sa dnevnog reda skinu: Prijedlog zakona o izmjenama i dopunama Zakona o izvršenju krivičnih sankcija u Federaciji Bosne i Hercegovine i Nacrt zakona o premjeru i registraciji nekretnina, što su delegati Doma naroda i prihvatili.

Predsjedavajuća je, zatim, stavila na glasanje i, na osnovu rezultata glasanja, konstatirala da je Dom naroda Parlamenta Federacije BiH, sa 37 glasova za, šest glasova protiv i tri uzdržana glasa, usvojio sljedeći

DNEVNI RED

1. Prijedlog zakona o penzijskom i invalidskom osiguranju-hitni postupak,
2. Prijedlog zakona o izmjenama i dopunama Zakona o radu-skraćeni postupak,
3. Prijedlog zakona o izmjenama i dopunama Zakona o igrama na sreću,
4. Nacrt zakona o kontroli i ograničenoj upotrebi duhana, duhanskih i ostalih proizvoda za pušenje,
5. Nacrt zakona o mirnom rješavanju radnih sporova,
6. Nacrt zakona o liječenju neplodnosti biomedicinski potpomognutom oplodnjom,
7. Nacrt zakona o porezu na dohodak,
8. Nacrt zakona o doprinosima,
9. Prijedlog odluke o prihvatanju zaduženja po Sporazumu o zajmu između Bosne i Hercegovine i Svjetske banke-Međunarodne banke za obnovu i razvoj (IBRD) za zajam za razvojnu politiku javnih finansija,
10. Prijedlog odluke o prihvatanju zaduženja po Sporazumu o zajmu između Bosne i Hercegovine i Svjetske banke-Međunarodne banke za obnovu i razvoj (IBRD) za Projekt podrške zapošljavanju,

11. Izvještaj o zaduženju Federacije Bosne i Hercegovine po osnovu emisije obveznica na dan 20.12.2016. godine,
12. Izvještaj o zaduženju Federacije Bosne i Hercegovine po osnovu emisije obveznica na dan 27.12.2016. godine,
13. Izvještaj o radu Federalnog ministarstva unutrašnjih poslova za period 1.1.-31.12. 2016. godine,
-Izvještaj o radu Federalne uprave policije za 2016. godinu,
14. Kvartalni izvještaj o dugu Q4/2016. godine,
15. Izvještaj o radu Vlade Federacije Bosne i Hercegovine za 2016. godinu,
16. Izvještaj o izvršenju Budžeta Federacije BiH za period 1.1.-31.12.2016. godine,
17. Godišnji plan zaduživanja za 2017. godinu

1. Prijedlog zakona o penzijskom i invalidskom osiguranju-hitni postupak

Prijedlog zakona utvrdila je Vlada FBiH i naknadno dostavila dva amandmana koji su postali sastavni dio Prijedloga zakona.

Predsjedavajuća je podsjetila da je Predstavnički dom Parlamenta Federacije BiH obavijestio Dom naroda da je u nastavku 19. sjednice održane 26. aprila 2017. godine, usvojio Prijedlog zakona o penzijskom i invalidskom osiguranju sa dva amandmana koja je Vlada Federacije prihvatila pa su postali sastavni dio Prijedloga zakona.

Na Prijedlog zakona amandmane su podnijeli Aner Žuljević, 79 amandmana i Predrag Kojović, tri amandmana.

Vlada Federacije je dostavila izjašnjenje kojim ne prihvata predložene amandmane od Anera Žuljevića i Predraga Kojovića.

Prijedlog zakona razmatrala su nadležna radna tijela i dostavila svoje izvještaje.

U raspravi su učestvovali: Vesko Drljača, federalni ministar rada i socijalne politike, Tomislav Martinović, predsjednik Kluba delegata hrvatskog naroda, Željko Mirković, Slaviša Šučur, Muhamed Kozadra, Mirvet Beganović, Aner Žuljević (koji je izjavio da odustaje od izjašnjavanja o podnesenim amandmanima), Osman Čatić, predsjednik Kluba delegata bošnjačkog naroda i Refik Poparić.

S obzirom da više nije bilo prijavljenih za raspravu, a da se Vlada Federacije, kao i pojedina radna tijela nisu izjasnili o predloženim amandmanima Kluba delegata hrvatskog naroda, predsjedavajuća je predložila da se ne

zaključuje rasprava i da se odgodi izjašnjavanje o zakonu do momenta kada se steknu potrebni uslovi.

Vesko Drljača, federalni ministar rada i socijalne politike je izjavio da se ne može izjasniti o amandmanima bez stava Vlade te da prihvata ovaj prijedlog.

Osman Ćatić, predsjednik Kluba delegata bošnjačkog naroda, zatražio je pauzu od 15 minuta nakon koje je sjednica prekinuta u 17:31 sati.

Nastavak sjednice od 1. juna 2017. godine

Sjednica je počela u 12:25 sati.

Sjednicom je predsjedavala Lidija Bradara, predsjedavajuća Doma naroda Parlamenta Federacije BiH.

Na početku sjednice, predsjedavajuća je pozdravila prisutne delegate, potpredsjednika Federacije, Milana Dunovića, premijera Federacije, Fadila Novalića, zamjenike premijera, Jelku Milićević i Veska Drljaču, ministre, Salku Bukvarevića, Josipa Martića, Editu Đapo, Zlatana Vujanovića, Nermina Džindića i Amira Zukića te predstavnike međunarodne zajednice, akreditiranih medijskih kuća, udruženja i goste.

Izostanak sa sjednice opravdali su Sejo Bukva, Željko Josić i Admir Hadžipašić.

Na osnovu evidencije Stručne službe, predsjedavajuća je konstatirala da sjednici prisustvuje 45 delegata, što čini većinu pa Dom naroda može raditi i punovažno odlučivati.

Aner Žuljević je od sekretara Doma naroda zatražio tumačenje člana 108. Poslovnika o radu Doma naroda, budući da je prekid sjednice trajao duže od 15 dana.

Sekretar Doma naroda je odgovorio da za kršenje Poslovnika nisu predviđene kaznene sankcije, te da se mogu primjeniti samo političke sankcije.

Aner Žuljević je izjavio da je prekršen Poslovnik i da će delegati iz SDP-a BiH današnju sjednicu tretirati kao javnu raspravu, tj. učestvovat će u raspravi o zakonima, ali neće učestvovati u glasanju o njima.

Predsjedavajuća je odgovorila da su svi delegati telefonski kontaktirani te da je odluka užeg rukovodstva Doma bila da se sjednica zakaže u dogledno vrijeme. Potom je pozvala delegate da se izjasne da li su za nastavak današnje sjednice.

Slaviša Šućur je izjavio da je Ustavni sud u jednoj od presuda zauzeo stav da Dom ne može svojom odlukom promijeniti nešto što je uređeno Poslovníkom.

Predsjedavajuća je odgovorila da samo Ustavni sud može tumačiti svoje odluke i, s obzirom da dio delegata smatra da se današnja sjednica ne treba održati zato što nije održana u roku od 15 dana kada je veliki dio delegata bio na putu, zatražila je da se Dom naroda izjasni o nastavku današnje sjednice.

Na osnovu rezultata glasanja, predsjedavajuća je konstatala da je Dom naroda Parlamenta Federacije sa 29 glasova za, tri uzdržana glasa i jednim glasom protiv, odlučio da se nastavi sa današnjom sjednicom.

Potom je predsjedavajuća podsjetila delegate na tačke dnevnog reda i prešla na rad.

1. Prijedlog zakona o penzijskom i invalidskom osiguranju-hitni postupak

Predsjedavajuća je podsjetila delegate da je Predstavnički dom Parlamenta Federacije u nastavku 19. sjednice od 26.4.2017. godine usvojio Prijedlog ovog zakona sa dva amandmana Vlade Federacije koji su postali sastavni dio Prijedloga zakona.

Na Prijedlog zakona amandmane su podnijeli delegati Aner Žuljević, Predrag Kojović i Klub delegata hrvatskog naroda.

Vlada Federacije je dostavila Izjašnjenje kojim ne prihvaća amandmane Anera Žuljevića i Predraga Kojovića i Amandman I Kluba delegata hrvatskog naroda, dok je Amandman II Kluba prihvatila.

Naknadno su Aner Žuljević i Klub delegata hrvatskog naroda podnijeli amandmane koje Vlada Federacije nije prihvatila.

Predsjedavajuća je podsjetila da rasprava nije zaključena i nastavila raspravu.

Domu naroda se obratio predstavnik Saveza penzionera Federacije BiH, Mehmedalija Rapa.

U raspravi nije niko učestvovao.

Nakon toga, predsjedavajuća je pozvala podnosiocce amandmana da se izjasne da li ostaju pri izjašnjavanju o amandmanima.

Budući da su podnosioci amandmana odustali od izjašnjavanja, predsjedavajuća je stavila na glasanje Prijedlog zakona o penzijskom i invalidskom osiguranju i konstatala da Dom naroda nije usvojio Prijedlog ovog

zakona, jer je za glasalo 13 delegata, 12 delegata je bilo uzdržano, a 11 delegata je bilo protiv.

Kako je Osman Ćatić, predsjednik Kluba delegata bošnjačkog naroda izrazio sumnju u rezultate glasanja, pristupilo se poimeničnom glasanju koje je obavio Izmir Hadživdić, sekretar Doma naroda.

Na osnovu rezultata poimeničnog glasanja, predsjedavajuća je konstatirala da Dom naroda nije usvojio Prijedlog zakona o penzijskom i invalidskom osiguranju, jer je za glasalo 13 delegata, 18 delegata je bilo uzdržano, a pet delegata je bilo protiv.

2. Prijedlog zakona o izmjenama i dopunama Zakona o radu-skraćeni postupak

Prijedlog zakona utvrdila je Vlada Federacije.

Predstavnički dom Parlamenta Federacije je u nastavku 19. sjednice od 26.4.2017. godine usvojio Prijedlog ovog zakona sa dva amandmana koja je Vlada Federacije prihvatila pa su postali sastavni dio Prijedloga zakona.

Na Prijedlog zakona amandmane su podnijeli Skupština Zapadnohercegovačkog kantona, Predrag Kojović, Osman Ćatić i Aner Žuljević

Skupština Zapadnohercegovačkog kantona podnijela je osam amandmana.

Predrag Kojović podnio je pet amandmana.

Osman Ćatić podnio je Amandman.

Aner Žuljević podnio je četiri amandmana.

Vlada Federacije dostavila je izjašnjenje kojim **prihvata** Amandman Osmana Ćatića, a **ne prihvata** podnesene amandmane Skupštine Zapadnohercegovačkog kantona, Anera Žuljevića i Predraga Kojovića.

Prijedlog zakona razmatrala su nadležna radna tijela i dostavila svoje izvještaje.

Prijedlog zakona je obrazložio Vesko Drljača, federalni ministar rada i socijalne politike.

U raspravi nije niko učestvovao.

Nakon toga, predsjedavajuća je pozvala podnosiocce amandmana da se izjasne da li ostaju pri izjašnjavanju o amandmanima.

Budući da su Aner Žuljević i Predrag Kojović odustali od izjašnjavanja, predsjedavajuća je stavila na glasanje Prijedlog zakona o izmjenama i dopunama Zakona o radu i konstatirala da je Dom naroda sa 28 glasova za, tri glasa protiv i četiri uzdržana glasa, usvojio Prijedlog ovog zakona, uz Amandman Osmana Ćatića kojeg je Vlada Federacije prihvatila pa je postao sastavni dio prijedloga zakona.

Amandman glasi:

Član 3. mijenja se i glasi:

“U členu 28. riječi: “u roku od 15 dana od dana zaključivanja ugovora o radu, odnosno početka rada”, zamjenjuju se riječima: “odmah na početku rada”.

Budući da je Vlada Federacije prihvatila ovaj Amandman, potrebno je da se Predstavnički dom izjasni o Amandmanu.

3. Prijedlog zakona o izmjenama i dopunama Zakona o igrama na sreću

Prijedlog zakona utvrdila je Vlada Federacije.

Na Prijedlog zakona amandmane su podnijeli Aner Žuljević, Anes Osmanović, Predrag Kojović i Klub delegata hrvatskog naroda.

Aner Žuljević podnio je šest amandmana.

Anes Osmanović podnio je jedan Amandman.

Predrag Kojović podnio je jedan Amandman.

Klub delegata hrvatskog naroda podnio je 11 amandmana.

Vlada Federacije je dostavila izjašnjenje kojim ne prihvaća ove amandmane.

Prijedlog zakona razmatrala su nadležna radna tijela i dostavila svoje izvještaje.

Prijedlog zakona je obrazložila Jelka Milićević, federalna ministrica finansija.

U raspravi nije niko učestvovao.

Nakon toga, predsjedavajuća je pozvala podnosiocce amandmana da se izjasne da li ostaju pri izjašnjavanju o amandmanima.

Anes Osmanović je izjavio da ne odustaje od amandmana.

Na osnovu rezultata glasanja, predsjedavajuća je konstatirala da Dom naroda nije usvojio amandman Anesa Osmanovića, jer je za glasalo 14 delegata, a 20 delegata je bilo uzdržano.

Budući da su ostali podnosioci amandmana odustali od izjašnjavanja, predsjedavajuća je stavila na glasanje Prijedlog zakona o izmjenama i dopunama Zakona o igrama na sreću i konstatirala da Dom naroda nije usvojio Prijedlog ovog zakona, jer je za glasalo 13 delegata, 17 delegata je bilo uzdržano, a četiri delegata su bila protiv.

Kako je Jasenko Tufekčić, potpredsjedavajući Doma naroda izrazio sumnju u rezultate glasanja, pristupilo se poimeničnom glasanju koje je obavio Izmir Hadžić, sekretar Doma naroda.

Na osnovu rezultata poimeničnog glasanja, predsjedavajuća je konstatirala da Dom naroda nije usvojio Prijedlog zakona o izmjenama i dopunama Zakona o igrama na sreću, jer je za glasalo 16 delegata, 16 delegata je bilo uzdržano, a pet delegata je bilo protiv.

4. Nacrt zakona o kontroli i ograničenoj upotrebi duhana, duhanskih i ostalih proizvoda za pušenje

Vlada Federacije utvrdila je Nacrt zakona.

Predstavnički dom Parlamenta Federacije je na 19. sjednici održanoj 14.3.2017. godine razmatrao Nacrt zakona o kontroli i ograničenoj upotrebi duhana, duhanskih i ostalih proizvoda za pušenje i Zaključkom ga prihvatio. Tom prilikom Nacrt zakona je upućen u javnu raspravu u trajanju od 30 dana.

Nacrt zakona razmatrala su nadležna radna tijela i dostavila svoje izvještaje.

U raspravi nije niko učestvovao.

Na osnovu rezultata glasanja, predsjedavajuća je konstatirala da je Dom naroda sa 29 glasova za i sedam uzdržanih glasova, usvojio sljedeći

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt zakona o kontroli i ograničenoj upotrebi duhana, duhanskih i ostalih proizvoda za pušenje i smatra da može poslužiti kao osnov za izradu Prijedloga zakona.
2. Zadužuje se Vlada Federacije da organizira i provede javnu raspravu u trajanju od 90 dana.
3. Zadužuje se Vlada Federacije da prilikom izrade Prijedloga zakona ima u vidu primjedbe, prijedloge i sugestije iznesene u pripremi sjednice sjednici kao i one u javnoj raspravi.

Kako je Slaviša Šućur, predsjednik Kluba delegata srpskog naroda izrazio sumnju u rezultate glasanja, pristupilo se poimeničnom glasanju koje je obavio Izmir Hadžić, sekretar Doma naroda.

Na osnovu rezultata poimeničnog glasanja, predsjedavajuća je konstatirala da je Dom naroda sa 35 glasova za i tri uzdržana glasa usvojio navedeni Zaključak.

5. Nacrt zakona o mirnom rješavanju radnih sporova

Vlada Federacije utvrdila je Nacrt zakona.

Predstavnički dom je na 20. sjednici održanoj 25.4.2017. godine razmatrao Nacrt ovog zakona i Zaključkom ga prihvatio. Tom prilikom, Nacrt ovog zakona je stavljen u javnu raspravu u trajanju od 60 dana.

Nacrt zakona razmatrala su nadležna radna tijela i dostavila svoje izvještaje.

Nacrt zakona je obrazložio Vesko Drljača, federalni ministar rada i socijalne politike.

U raspravi nije niko učestvovao.

Na osnovu rezultata glasanja, predsjedavajuća je konstatirala da je Dom naroda sa 29 glasova za i tri uzdržana glasa usvojio sljedeći

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt zakona o mirnom rješavanju radnih sporova i smatra da može poslužiti kao osnov za izradu Prijedloga zakona.
2. Zadužuje se predlagač da organizira i provede javnu raspravu u trajanju od 60 dana.
3. Zadužuje se predlagač da prilikom izrade Prijedloga zakona ima u vidu primjedbe, prijedloge i sugestije iznesene u pripremi sjednice Doma naroda, kao i one iznesene u okviru javne rasprave.

6. Nacrt zakona o liječenju neplodnosti biomedicinski potpomognutom oplodnjom

Vlada Federacije utvrdila je Nacrt zakona.

Predstavnički dom je na 20. sjednici održanoj 25.4.2017. godine razmatrao Nacrt ovog zakona i Zaključkom ga prihvatio. Tom prilikom, Nacrt ovog zakona je stavljen u javnu raspravu u trajanju od 30 dana.

Nacrt zakona razmatrala su nadležna radna tijela i dostavila svoje izvještaje.

U raspravi nije niko učestvovao.

Na osnovu rezultata glasanja, predsjedavajuća je konstatirala da je Dom naroda sa 30 glasova za i jednim uzdržanim glasom, usvojio sljedeći

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt zakona o liječenju neplodnosti biomedicinski potpomognutom oplodnjom i smatra da može poslužiti kao osnov za izradu Prijedloga zakona.
2. Zadužuje se Vlada Federacije da organizira i provede javnu raspravu u trajanju od 30 dana.
3. Zadužuje se Vlada Federacije da prilikom izrade Prijedloga zakona ima u vidu primjedbe, prijedloge i sugestije iznesene u pripremi sjednice kao i one u javnoj raspravi.

7. Nacrt zakona o porezu na dohodak

Nacrt zakona je utvrdila Vlada Federacije.

Predstavnički dom je na 20. sjednici održanoj 25.4.2017. godine razmatrao Nacrt ovog zakona i Zaključkom ga prihvatio. Tom prilikom, Nacrt ovog zakona je stavljen na javnu raspravu u trajanju od 60 dana.

Nacrt zakona razmatrala su nadležna radna tijela i dostavila svoje izvještaje.

Nacrt zakona je obrazložila Jelka Milićević, federalna ministrica finansija.

U raspravi su učestvovali Osman Ćatić i Tomislav Martinović, koji su u ime klubova delegata bošnjačkog i hrvatskog naroda, predložili da se rasprava o Nacrtu zakona o porezu na dohodak nastavi na sjednici predviđenoj za 22.6.2017. godine, do kada bi Federalno ministarstvo finansija dostavilo Domu naroda analizu učinaka ovog zakona u odnosu na Federaciju, kantone i jedinice lokalne samouprave. Predsjedavajuća je stavila ovaj prijedlog na glasanje i konstatirala da je Dom naroda sa 28 glasova za, tri glasa protiv i tri uzdržana glasa, prihvatio ovaj prijedlog.

8. Nacrt zakona o doprinosima

Nacrt zakona je utvrdila Vlada Federacije.

Predstavnički dom je na 20. sjednici održanoj 25.4.2017. godine razmatrao Nacrt ovog zakona i Zaključkom ga prihvatio. Tom prilikom, Nacrt ovog zakona je stavljen u javnu raspravu u trajanju od 60 dana.

Nacrt zakona razmatrala su nadležna radna tijela i dostavila svoje izvještaje.

Nacrt zakona je obrazložila Jelka Milićević, federalna ministrica finansija.

Budući da su Osman Ćatić i Tomislav Martinović u ime klubova delegata bošnjačkog i hrvatskog naroda predložili da se rasprava o Nacrtu zakona o doprinosima nastavi na sjednici predviđenoj za 22.6.2017. godine, do kada bi Federalno ministarstvo finansija dostavilo Domu naroda analizu učinaka ovog zakona u odnosu na Federaciju, kantone i jedinice lokalne samouprave, predsjedavajuća je stavila ovaj prijedlog na glasanje i konstatirala da je Dom naroda sa 31 glasom za, dva glasa protiv i dva uzdržana glasa, prihvatio ovaj prijedlog.

9. Prijedlog odluke o prihvatanju zaduženja po Sporazumu o zajmu između Bosne i Hercegovine i Svjetske banke-Međunarodne banke za obnovu i razvoj (IBRD) za zajam za razvojnu politiku javnih finansija

Prijedlog odluke utvrdila je Vlada Federacije i dostavila je, sa popratnim materijalima, Parlamentu Federacije radi razmatranja i donošenja.

Predstavnički dom je na 20. sjednici održanoj 25.4.2017. godine donio Odluku o prihvatanju zaduženja po Sporazumu o zajmu između Bosne i Hercegovine i Svjetske banke-Međunarodne banke za obnovu i razvoj (IBRD) za zajam za razvojnu politiku javnih finansija.

Prijedlog odluke razmatrala su nadležna radna tijela i dostavila svoje izvještaje.

U raspravi nije niko učestvovao.

Na osnovu rezultata glasanja, predsjedavajuća je konstatirala da je Dom naroda sa 30 glasova za i dva uzdržana glasa, donio Odluku o prihvatanju zaduženja po Sporazumu o zajmu između Bosne i Hercegovine i Svjetske banke-Međunarodne banke za obnovu i razvoj (IBRD) za zajam za razvojnu politiku javnih finansija.

10. Prijedlog odluke o prihvatanju zaduženja po Sporazumu o zajmu između Bosne i Hercegovine i Svjetske banke-Međunarodne banke za obnovu i razvoj (IBRD) za Projekt podrške zapošljavanju

Prijedlog odluke utvrdila je Vlada Federacije i dostavila, sa popratnim materijalima, Parlamentu Federacije radi razmatranja i donošenja.

Predstavnički dom je na 20. sjednici održanoj 25.4.2017. godine donio Odluku o prihvatanju zaduženja po Sporazumu o zajmu između Bosne i Hercegovine i

Svjetske banke-Međunarodne banke za obnovu i razvoj (IBRD) za Projekt podrške zapošljavanju.

Prijedlog odluke razmatrala su nadležna radna tijela i dostavila svoje izvještaje.

U raspravi nije niko učestvovao.

Na osnovu rezultata glasanja, predsjedavajuća je konstatirala da je Dom naroda, sa 32 glasa za, dva glasa protiv i jednim uzdržanim glasom, donio Odluku o prihvatanju zaduženja po Sporazumu o zajmu između Bosne i Hercegovine i Svjetske banke-Međunarodne banke za obnovu i razvoj (IBRD) za Projekt podrške zapošljavanju.

11. Izvještaj o zaduženju Federacije Bosne i Hercegovine po osnovu emisije obveznica na dan 20.12.2016. godine

12. Izvještaj o zaduženju Federacije Bosne i Hercegovine po osnovu emisije obveznica na dan 27.12.2016. godine

Vlada Federacije Bosne i Hercegovine dostavila je radi informiranja Parlamentu Federacije izvještaje o zaduženju Federacije Bosne i Hercegovine po osnovi emisije obveznica koje je Vlada Federacije usvojila.

Ove izvještaje razmatrala su nadležna radna tijela i dostavila svoje izvještaje.

U raspravi nije niko učestvovao.

Budući da su ovi izvještaji dostavljeni radi informiranja, predsjedavajuća je konstatirala da je Dom naroda Parlamenta Federacije BiH primio k znanju Izvještaj o zaduženju Federacije Bosne i Hercegovine po osnovu emisije obveznica na dan 20.12.2016. godine i Izvještaj o zaduženju Federacije Bosne i Hercegovine po osnovu emisije obveznica na dan 27.12.2016. godine

**13. Izvještaj o radu Federalnog ministarstva unutrašnjih poslova za period 1.1. -31.12. 2016. godine,
-Izvještaj o radu Federalne uprave policije za 2016. godinu**

Ove izvještaje dostavila je Vlada Federacije u skladu sa članom 15. Zakona o unutrašnjim poslovima Federacije Bosne i Hercegovine.

Izvještaje su razmatrala nadležna radna tijela i dostavila svoje izvještaje.

Izvještaje je obrazložio Aljoša Čampara, federalni ministar unutrašnjih poslova.

U ime Komisije za sigurnost, predsjednik Komisije pročitao je zaključke i predložio Domu naroda da ih usvoji.

U raspravi nije niko učestvovao.

Na osnovu rezultata glasanja, predsjedavajuća je konstatirala da je Dom naroda sa 33 glasa za, usvojio zaključke Komisije za sigurnost koji glase:

ZAKLJUČKE

1. Dom naroda Parlamenta Federacije BiH predlaže Vladi Federacije BiH da u 2017. godini osigura potrebna sredstva za popunu upražnjenih radnih mjesta u Federalnoj upravi policije budući da je popunjenost oko 70%.
2. Zadužuje se Kolegij Doma naroda Parlamenta Federacije BiH da prilikom utvrđivanja Programa rada Doma naroda Parlamenta Federacije BiH u narednom periodu, planira razmatranje Informacije o stanju sigurnosti na području Federacije BiH, Izvještaj o radu Federalnog ministarstva unutrašnjih poslova i Izvještaj o radu Federalne uprave policije u prvom kvartalu tekuće godine kako bi se mogla organizirati tematska sjednica po pitanju sigurnosti.

Na osnovu rezultata glasanja, predsjedavajuća je konstatirala da je Dom naroda sa 32 glasa za i četiri uzdržana glasa, prihvatio Izvještaj o radu Federalnog ministarstva unutrašnjih poslova za period 1.1.-31.12.2016. godine i Izvještaj o radu Federalne uprave policije za 2016. godinu.

14. Kvartalni izvještaj o dugu Q4/2016. godine

Vlada Federacije Bosne i Hercegovine dostavila je, radi informiranja, Parlamentu Federacije Kvartalni izvještaj o dugu Q4/2016.godine.

Izvještaj su razmatrala nadležna radna tijela i dostavila svoje izvještaje.

U raspravi nije niko učestvovao.

Budući da je Izvještaj dostavljen radi informiranja, predsjedavajuća je konstatirala da je Dom naroda Parlamenta Federacije BiH primio k znanju Kvartalni izvještaj o dugu Q4/2016.godine.

15. Izvještaj o radu Vlade Federacije Bosne i Hercegovine za 2016. godinu

Izvještaj o radu dostavila je Vlada Federacije radi razmatranja.

Naknadno, Vlada Federacije dostavila je dopis u kojim iz parlamentarne procedure **povlači** Izvještaj o radu Vlade Federacije BiH za 2016. godinu i dostavila, radi razmatranja, **dopunjeni** Izvještaj o radu Vlade Federacije BiH za 2016. godinu.

Izvještaj su razmatrala nadležna radna tijela i dostavila svoje izvještaje.

Izvještaj je obrazložio premijer Federacije Fadil Novalić.

U raspravi su učestvovali Predrag Kojović i Mirvet Beganović.

Na osnovu rezultata glasanja, predsjedavajuća je konstatirala da Dom naroda Parlamenta Federacije BiH nije prihvatio Izvještaj o radu Vlade Federacije Bosne i Hercegovine za 2016. godinu, jer je za glasalo 27 delegata, pet delegata je bilo uzdržano, a šest delegata je bilo protiv.

Jasenko Tufekčić, potpredsjedavajući Doma naroda, izrazio je sumnju u rezultate glasanja te se pristupilo poimeničnom glasanju kojeg je obavio Izmir Hadžićević, sekretar Doma naroda.

Na osnovu rezultata poimeničnog glasanja, predsjedavajuća je konstatirala da Dom naroda nije prihvatio Izvještaj o radu Vlade Federacije Bosne i Hercegovine za 2016. godinu, jer je za glasalo 27 delegata, pet delegata je bilo uzdržano, a šest delegata je bilo protiv.

16. Izvještaj o izvršenju Budžeta Federacije BiH za period 1.1.-31.12.2016. godine

Vlada Federacije dostavila je Izvještaj o izvršenju Budžeta Federacije Bosne i Hercegovine radi razmatranja i usvajanja. Predstavnički dom na 21. sjednici od 16.5.2017. godine nije prihvatio Izvještaj o izvršenju Budžeta Federacije BiH za period 1.1.-31.12.2016. godine jer prilikom glasanja nije dobio potrebnu većinu.

Izvještaj su razmatrala nadležna radna tijela i dostavila svoje izvještaje.

Izvještaj je obrazložila Jelka Milićević, federalna ministrica finansija.

U raspravi nije niko učestvovao.

Na osnovu rezultata glasanja, predsjedavajuća je konstatirala da Dom naroda Parlamenta Federacije BiH nije prihvatio Izvještaj o izvršenju Budžeta Federacije BiH za period 1.1.-31.12.2016. godine, jer je za glasalo 27 delegata, osam delegata je bilo uzdržano, a dva delegata su bila protiv.

Kako je Tomislav Martinović, predsjednik Kluba delegata hrvatskog naroda izrazio sumnju u rezultate glasanja, pristupilo se poimeničnom glasanju kojeg je obavio Izmir Hadžić, sekretar Doma naroda.

Na osnovu rezultata poimeničnog glasanja, predsjedavajuća je konstatirala da je Dom naroda Parlamenta Federacije, sa 28 glasova za, dva glasa protiv i osam uzdržanih, usvojio Izvještaj o izvršenju Budžeta Federacije BiH za period 1.1.-31.12.2016. godine.

17. Godišnji plan zaduživanja za 2017. godinu

Vlada Federacije Bosne i Hercegovine dostavila je radi informiranja, Parlamentu Federacije Godišnji plan zaduživanja za 2017.godinu

Godišnji plan razmatrala su nadležna radna tijela i dostavila svoje izvještaje.

U raspravi nije niko učestvovao.

Budući da je Godišnji plan dostavljen radi informiranja, predsjedavajuća je konstatirala da je Dom naroda Parlamenta Federacije BiH primio k znanju Godišnji plan zaduživanja za 2017. godinu.

Sjednica je prekinuta u 15:00 sati.

Nastavak sjednice od 6. jula 2017. godine

Sjednica je počela u 12:30 sati.

Sjednicom je predsjedavala Lidija Bradara, predsjedavajuća Doma naroda Parlamenta Federacije BiH.

Na početku sjednice, predsjedavajuća je pozdravila prisutne delegate, predsjednika Federacije Marinka Čavaru, potpredsjednike Federacije Meliku Mahmutbegović i Milana Dunovića, premijera Federacije, prisutne ministre i predstavnike međunarodne zajednice, akreditiranih medijskih kuća i goste.

Izostanak sa sjednice opravdali su Amor Mašović, Mladen Lonić, Predrag Kojović, Lejla Imamović, Daliborka Milović i Amil Buljubašić.

Na osnovu evidencije Stručne službe, predsjedavajuća je konstatirala da sjednici prisustvuje 40 delegata, što čini većinu pa Dom naroda može raditi i punovažno odlučivati.

Predsjedavajuća je podsjetila delegate da je preostao nastavak rasprave o Nacrtu zakona o porezu na dohodak i Nacrtu zakona o doprinosima i predložila da se obavi zajednička rasprava o obje tačke dnevnog reda, a izjašnjavanje pojedinačno. Delegati su prihvatili ovaj prijedlog.

7. Nacrt zakona o porezu na dohodak

Nacrt zakona je utvrdila Vlada Federacije.

Predstavnički dom Parlamenta Federacije je na 20. sjednici održanoj 25.4.2017. godine razmatrao Nacrt zakona o porezu na dohodak i Zaključkom ga prihvatio. Tom prilikom Zakon je stavljen u javnu raspravu u trajanju od 60 dana.

Federalno ministarstvo finansija je dostavilo analizu efekata Nacrta zakona o porezu na dohodak u odnosu na Federaciju BiH, kantone i jedinice lokalne samouprave.

Analizu efekata je obrazložio Hajrudin Hadžimehanović, pomoćnik federalne ministricе finansija.

U raspravi su učestvovali: predsjednik Kluba delegata hrvatskog naroda Tomislav Martinović, Fuad Hadžimehmedović, Admir Hadžipašić, Ismet Sarajlić, Aner Žuljević, Zdravko Bešlić, predsjednik Kluba delegata bošnjačkog naroda, Osman Čatić (koji je u ime Kluba pročitao prijedlog zaključka), Mirvet Beganović, Rasim Dostović, Željko Mirković, Muhamed Kozadra, Damir Jukić, Draženka Subašić i federalna ministrica finansija, Jelka Milićević.

8. Nacrt zakona o doprinosima

Nacrt zakona je utvrdila Vlada Federacije.

Predstavnički dom Parlamenta Federacije je na 20. sjednici održanoj 25.4.2017.godine razmatrao Nacrt zakona o doprinosima i Zaključkom ga prihvatio. Tom prilikom Zakon je stavljen u javnu raspravu u trajanju od 60 dana.

Federalno ministarstvo finansija je dostavilo analizu efekata Nacrta zakona o doprinosima u odnosu na Federaciju BiH, kantone i jedinice lokalne samouprave.

U raspravi su učestvovali: Mirvet Beganović, predsjednik Kluba delegata hrvatskog naroda, Tomislav Martinović, Draženka Subašić, Muhamed Kozadra, Zdravko Bešlić i federalna ministrica finansija, Jelka Milićević.

Budući da su Klub delegata hrvatskog naroda i Klub delegata bošnjačkog naroda zatražili pauzu, predsjedavajuća ja dala pauzu u trajanju od 30 minuta.

Nakon pauze, na zahtjev predsjedavajuće Doma naroda, sekretar Doma naroda Izmir Hadžićević, izvršio je prozivku delegata radi utvrđivanja kvoruma.

Na osnovu izvršene prozivke, predsjedavajuća je konstatirala da sjednici prisustvuje 26 delegata, što ne čini kvorum, te prekinula zasjedanje u 16:16 sati.

Nastavak sjednice od 21. septembra 2017. godine

Sjednica je počela u 11:50 sati.

Sjednicom je predsjedavala Lidija Bradara, predsjedavajuća Doma naroda Parlamenta Federacije BiH.

Na početku sjednice, predsjedavajuća je pozdravila prisutne delegate, potpredsjednicu Federacije, doktoricu Meliku Mahmutbegović, zamjenicu predsjednika Vlade Federacije, Jelku Milićević, prisutne ministre, potpredsjedavajuću Predstavničkog doma, Vesnu Švancer, načelnicu Visokog Amru Babić, predstavnike akreditiranih medijskih kuća i goste.

Izostanak sa sjednice opravdao je Zdravko Bešlić.

Na osnovu evidencije Stručne službe, predsjedavajuća je konstatirala da sjednici prisustvuje 44 delegata, što čini većinu pa Dom naroda može raditi i punovažno odlučivati.

Predsjedavajuća je podsjetila delegate da je preostalo izjašnjavanje o Nacrtu zakona o porezu na dohodak i Nacrtu zakona o doprinosima i prešla na izjašnjavanje.

7. Nacrt zakona o porezu na dohodak

Predsjedavajuća je stavila na glasanje sljedeći

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt zakona o porezu na dohodak i smatra da može poslužiti kao osnov za izradu Prijedloga zakona.
2. Zadužuje se Vlada Federacije BiH da, na osnovu člana 34. stav 4. Zakona o principima lokalne samouprave u Federaciji BiH pribavi mišljenje Saveza općina i gradova Federacije BiH na Nacrt zakona o porezu na dohodak. U slučaju negativne fiskalne procjene po pojedine kantone, jedinice lokalne samouprave ili vanbudžetske fondove, predložiti izvor sredstava za nedostajuća sredstva za kantone, jedinice lokalne samouprave i vanbudžetske fondove.
3. Zadužuje se predlagač da organizira javnu raspravu u trajanju od 90 dana koja će se provoditi i u kantonima.
4. Zadužuje se predlagač da prilikom izrade Prijedloga zakona ima u vidu primjedbe, prijedloge i sugestije iznesene na sjednici Doma naroda i u javnoj raspravi.

Na osnovu rezultata glasanja, predsjedavajuća je konstatirala da Dom naroda Parlamenta Federacije nije usvojio ovaj Zaključak, jer je za glasalo 27 delegata, četiri delegata su bila uzdržana, a 11 delegata je bilo protiv.

Budući da je izražena sumnja u rezultate glasanja, pristupilo se poimeničnom glasanju kojeg je obavio sekretar Doma naroda, Izmir Hadžiavdić.

Na osnovu rezultata poimeničnog glasanja, predsjedavajuća je konstatirala da je Dom naroda Parlamenta Federacije usvojio ovaj Zaključak, jer je za glasalo 29 delegata, sedam delegata je bilo uzdržano, a 12 delegata je bilo protiv.

8. Nacrt zakona o doprinosima

Na osnovu rezultata glasanja, predsjedavajuća je konstatirala da je Dom naroda Parlamenta Federacije, sa 30 glasova za, pet uzdržanih i 11 glasova protiv, usvojio sljedeći

ZAKLJUČAK

1. Dom naroda Parlamenta Federacije Bosne i Hercegovine prihvata Nacrt zakona o doprinosima i smatra da može poslužiti kao osnov za izradu Prijedloga zakona.
2. Zadužuje se Vlada Federacije BiH da, na osnovu člana 34. stav 4. Zakona o principima lokalne samouprave u Federaciji BiH pribavi mišljenje Saveza općina i gradova Federacije BiH na Nacrt zakona o doprinosima. U slučaju negativne fiskalne procjene po pojedine kantone, jedinice lokalne samouprave ili vanbudžetske fondove, predložiti izvor sredstava za nedostajuća sredstva za kantone, jedinice lokalne samouprave i vanbudžetske fondove.
3. Zadužuje se predlagač da organizira javnu raspravu u trajanju od 90 dana koja će se provoditi i u kantonima.
4. Zadužuje se predlagač da prilikom izrade Prijedloga zakona ima u vidu primjedbe, prijedloge i sugestije iznesene na sjednici Doma naroda kao i one iznesene u javnoj raspravi.

Sjednica je završena u 12 sati.

Transkript sjednice čini sastavni dio Zapisnika.

SEKRETAR

Izmir Hadžiavdić

PREDSJEDAVAJUĆA

Lidija Bradara